

劇目：真實之光

編劇：中三 譚雅庭 鄭子欣 中五 容嘉怡 盧浩然 丘曦晴 張嘉琨 楊子欣 關穎妍 蔡宛霖 黃婉雯 劉咏晴

學校：聖母無玷聖心書院

### 第一場

（病房內，眾人商議母親治療方案）

（母親睡在病床上，家人們圍坐在病床前側桌椅，一臉愁緒低頭靜默）

（一會，細佬抬頭看眾人眼色，打破沉默）

1. 細佬 喂，咁……而家點部署啊？
2. 大家姐 咩部署啊，正經啲啦！
3. 大哥 （深呼吸） 醫生話傳統一般都會喺醫院做化療，不過考慮到癌細胞嘅位置，同埋阿媽嘅年紀，做嚟都未必太大幫助，盞辛苦阿媽。（稍作猶豫）佢建議我哋考慮接阿媽返屋企做舒緩治療，等佢最後嘅時間可以喺熟悉嘅屋企同我哋一齊過。  
（有人沉默、有人嘆息、有人搖頭）
4. 大家姐 我覺得……接阿媽返屋企好啲，無謂要佢幾十歲人受呢啲苦啦，又唔知化療副作用有幾大。
5. 大哥 係囉，阿媽咁貪靚，做完化療用晒啲頭髮佢都唔會開心啦！  
（大嫂望一眼大哥，輕嘖了一聲）  
（母親輕手輕腳地把被子揭開，露出了臉）
6. 二家姐 甩頭髮都好過冇咗條命啊？梗係喺醫院接受治療啦  
（一道黃光照在二家姐身上，二家姐忽爾低落，其他人靜止不動）
7. 二家姐 如果我多啲返屋企食飯，可能可以早啲發現阿媽唔舒服，唔使搞到而家咁……已經未期肝癌……  
（黃光褪去，眾人回復原狀）
8. 大嫂 雖然我係半個外人有資格加把嘴……但阿媽身體點都最重要，喺醫院有護士照顧佢啲，一定好過我哋接返屋企搵手唔成勢啦，陣間整親阿媽點算？  
（一道黃光照在大嫂身上，大嫂一臉嫌棄，其他人靜止不動）
9. 大嫂 唔好玩啦，接咗佢返屋企邊個照顧佢啊，你哋個個都返工，唔係旨意我啊嘛，難聽啲講句，個阿媽我又冇份。  
（黃光褪去，眾人回復原狀）
10. 細佬 咩外人啊，阿嫂，你嫁咗入嚟我哋就係一家人！

11. 大家姐 (略為激動) 我夠知阿媽身體最重要啦，而家得你哋為佢着想咩？但你哋有冇諗過，做完化療之後乜嘢生活質素都有晒，攞錢嚟買時間有意思咩？
12. 大哥 (望向大家姐) 我諗佢唔係咁嘅意思，你……你唔好咁激動。(望回大嫂) 老婆，醫生都話阿媽情況唔樂觀，我哋可以陪佢就盡量陪佢，做舒緩治療起碼唔使佢咁辛苦 (大嫂沒有理會大哥) 細佬呢？你點睇啊？  
(一道黃光照在大哥身上，大哥手托着頭一臉無奈，其他人靜止不動)
13. 大哥 唉，連呢啲時候都要嘈，又夾我喺中間，細佬你出嚟頂住先啦！  
(黃光褪去，眾人回復原狀)
14. 細佬 吓？哦……係囉係囉 (點頭)  
(一道黃光照在細佬身上，細佬拉伸頸肩，其他人靜止不動)
15. 細佬 我個肚餓到打曬鼓，都唔知你哋嘈嚟有咩用，直接問阿媽想點咪得囉！  
(黃光褪去，眾人回復原狀)  
(母親探頭作偷窺狀，東張西望)
16. 二家姐 我明……但係舒緩治療咪等同於放棄好返嘅機會？我哋點可以放棄阿媽㗎？  
(一道黃光照在二家姐身上，二家姐看向病床，其他人靜止不動)
17. 二家姐 之前一直冇好好盡孝道，我只係想要多啲時間彌補……多少少都好……  
(黃光褪去，眾人回復原狀)
18. 細佬 你哋一人少句啦，一係喺醫院做舒緩治療囉，只要我哋同阿媽一齊，邊度都係屋企。
19. 大哥 (不耐煩) 咁你係咪要陪阿媽馴醫院啊？細佬。
20. 細佬 唔係……我見氣氛咁凝重，諗住搞吓笑啫  
(母親伸手到枕頭下，拿出了一個公文袋，招手想叫子女，但眼見氣氛緊張，欲言又止)
21. 二家姐 你都成廿歲人，搞笑仲唔識睇場合？
22. 大家姐 而家阿媽就嚟死喇，你究竟知唔知啫？
23. 大哥 你幫唔到手都算啦，可唔可以尊重下阿媽？
24. 大嫂 係囉細佬，今次一家人我都唔幫你喇！  
(眾人各執一詞，爭先打斷對方)
25. 大家姐 總之我覺得要帶阿媽返屋企，貪醫院死得人多咩！
26. 二家姐 點解你覺得咁樣係為阿媽好啊？
27. 大嫂 定你唔想畀住院費咋？
28. 大哥 (拍檯) 嘈夠未啊？你哋咁樣嘈有咩意思？嘈醒阿媽問吓佢想點囉！

(一道黃光照在母親身上，其他人靜止不動)

(母親坐起身，從公文袋中抽出患病報告，看着文件長嘆了一口氣)

29. 母親

死喇，今鋪真係玩大咗……

(母親移開了握着文件右下方的手，文件上以紅印章印上:錯誤文件)

(完)